


**TEZAUUR LITURGIC**  
**8 AUGUST**

**SLUJBA**  
**SF. CUVIOS**  
**FILARET**  
**KULAKOV**  
**DE LA**  
**ICIALKOV**



**MOSCOVA, 2000**



# Месяца августа в 8-й день Служба преподобному и богоносному отцу нашему Филарету, Ичалковскому чудотворцу

## НА МАЛОЙ ВЕЧЕРНИ

Стихиры на 4, глас 4:

Кротостию души и смирением сердца, /  
духовными восхожденьми и божественным  
своим рачением / ты волю свою, блаженне,  
Богови покорил еси, / отлучитися мирских  
смущений устремился еси / и тако в молитвах и  
пощениях Господеви благоугодил еси, / Егоже  
моли, отче наш, / даровати душам нашим  
оставление прегрешений наших / и велию  
милость.

Следуя стопами братии своея, / душевно им  
сорадуяся, / всяко возжелев подражати  
устремлениям их, / к Богу единому притекл еси,  
/ Того благодатию присно насыщаяся и Ему  
Единому пламенея работал еси, / Егоже моли,  
блаженне Филарете, / во еже спастися душам  
нашим.

Преподобне отче наш Филарете, ты от юности  
своея житию духа себе возревновал еси, / и яко

Алексий, человек Божий, / любовь плотскую и дом отчий оставил еси / и в пустыньку малую стопы своя направил еси / идеже подвиги своя духовныя совершал еси, / темже по днех трудов твоих Господь даде ти венец нетленный, Егоже моли, святе отче наш, / даровати чтущим святую память твою оставление грехов / и велию милость.

Слава, глас тойже:

Богоблаженне отче наш Филарете, / Божественным светом благодати Божией озаряем быв, / и в пустыньку явлену ти свыше себе скоро подвигл еси, / идеже пребывая в молитве, Богомыслии и трудолюбии, / любовь Христову стяжал еси, / и вооружився силою креста, / Господу благоугодил еси, / того ради радости и веселия вси исполнишася, / яко похвальными песньми венчаим земнаго ангела и небеснаго человека, / сия бо преподобному Филарету начало славы полагается, / еяже общники и нас сотвори твоими молитвами, блаженне.

И ныне, Богородичен, глас тойже:

Спаси от бед рабы Твоя, Богородице Дево, яко вси по Бозе к Тебе прибегаем, / яко нерушимей стене и предстательству.

На стиховне стихирь, глас 3:

Изшед от отечествия твоего, блаженне отче наш  
Филарете, / обители Саровския достигл еси, / и  
тамо на путь спасительный свой благословение  
Божие испросил еси, / сие убо и нам низпосли, /  
совершающим святую память твою.

Стих: Честна пред Господем / смерть  
преподобных Его.

Богомудре отче наш Филарете, Ичалковския  
земли украшение явился еси, / и всем  
христоименитем людем в вере их Божественное  
утверждение.

Стих: Блажен муж бояйся Господа, / в заповедех  
Его восхощет зело.

Благоухает ныне священная рака мощей твоих,  
блаженне отче наш Филарете, / и всем  
притекающим к ти с верою и любовью /  
даруеши исцеления и полезное коемуждо вся  
просимая, / темже мы ныне прославляем  
Господа, дивнаго во святых Своих.

Слава, и ныне, Богородичен, глас 4:

Спаси от бед рабы Твоя, Богородице Дево, / яко  
все по Бозе к Тебе прибегаем, / яко нерушимей  
стене и предстательству.

## НА ВЕЛИЦЕЙ ВЕЧЕРНИ

Блажен муж: 1-й антифон.

На Господи возвах: стихиры на 8:попразднству  
Преображения на 3 и святому на 5,глас 4:

Приспе день памяти твоя, отче Филарете  
преславне, / и Ичалковская земля радостию  
исполняется, / яко твоим благосердием и твоим  
благим дерзновением яже к Богу / многия люди  
в вере утвердишася, / и твоими подвиги  
благочестию научившися / и на твоя молитвы  
уповаючи, имиже, отче преподобне, / испроси  
нам в вере утверждение, и душам нашим велию  
милость.

Во славней памяти твоей, угодниче Христов,  
ичалковстии людие ликовствуют / и о  
богоугодном житии твоём ревностию  
исполняются, / твоим же святым мощем  
покланяющесе, / яко живущему ти с нами  
молятся, глаголюще: / отче наш Филарете,  
милостиве и благоуветливе, / испроси нам у  
Господа почитающим святую память твою / мир  
и велию милость.

Родительский дом и вся блага его презрев, /  
отца и мать, к сим же и обручницу свою, вся  
оставил еси, / желанием благоугодити  
Господеви, отче наш Филарете, / похоти  
палящая вся угасил еси, сладость же телесную  
Божественным ангельским подобием пременив,

/ и на нетленная всем сердцем простираяся. /  
Сего ради Христос Господь большими тя  
дарованиями обогати и прослави, / Егоже моли,  
преподобне, / даровати душам нашим мир и  
велию милость.

Следуя гласу Божию свыше, / в пустыньку  
приалатырскую вселился еси, / преподобне отче  
наш Филарете, и яко древо при водах насажден,  
/ день и ночь поучаяся в закони Господни, /  
плоды воздержания благия Господеви принесл  
еси, / Егоже моли, блаженне отче наш, всем с  
верою прибегающим к раце мощей твоих /  
благодать исцеления даровати, мир и велию  
милость.

Преподобне отче наш Филарете, / ты от юности  
отверглся еси мира и сродников своих / и приял  
еси образ ангельский иноческаго жития / и в  
приалатырской горе со всяким смирением и  
послушанием Воли Божией, / яко добрый воин  
Христов, / добре подвизался еси, / идеже  
ударения, раны и инья безчестия от злых  
человек принимал еси, / прощая многим  
согрешения их ради Спаса Христа. / Того умоли,  
блаженне отче наш, / даровати и нам  
почитающим святую память твою таковое  
смирение / и душам нашим велию милость.  
Днесь ичалковстии людие светло торжествуют,  
совершающе святую память твою, / днесь

ичалковстии людие радости исполняются, /  
имущи толикаго своего молитвенника и своего  
небеснаго покровителя, / сего ради велегласно  
все вопием ему: / отче наш преблаженнейший,  
/ ты, оставив мир и вся яже в мире, / и любви  
ради Христовы не убоявшись прилогов вражиих,  
/ в приалатырскую гору преселился еси, и тамо  
ангельски пожил еси, / темже мы, ныне  
прославляя святую память твою, отче наш,  
молим тя / даровати нам мир и душам нашим  
велию милость.

Твоим словесем, Господи, последовав,  
преподобный отец наш Филарет, / вся  
временная и скоропреходящая оставив: дом и  
вся блага его презрев, / о юности своей мало  
радея, / измлада подобяся братии своей, / таже  
вооружився постом и молитвою, / исконнаго  
врага тем самым побеждая, / сего ради адамант  
крепок благочестия явился, / всю Ичалковскую  
землю подвиги своими просветивый и  
прославивый. / Того молитвами, Всемилоствие  
Господи, / подаждь нам мир и велию милость.

Слава, глас 8:

Приидите, ичалковстии боголюбивии людие, /  
песнями духовными почтим преподобнаго отца  
нашего Филарета, / той бо ныне воистину  
сподобися Божественныя славы, и венец  
нетленный / прият от Владыки Христа. / Сего

ради Архангельский сей дом Божий ныне  
благоукрасися, / имея в себе сокровище  
добродетелей — сосуд чистоты, целомудрия  
хранителя, приятилице благодати, / источник  
исцелений, болящим врача безмездна, / в  
скорбех утешителя, житейскими страстьми  
обуреваемых тихое пристанище, / и вси людие,  
зряще раку мощей блаженнаго, / прославляют  
Бога во Святей Троице славимаго, / дивнаго во  
святых Своих.

И ныне, глас тойже:

Царь небесный за человеколюбие на земли  
явися, / и с человеки поживе: / от Девы бо  
чистыя плоть приемый, / и из Нея прошедый с  
восприятием, / един есть Сын сугуб естеством,  
но не Ипостасию, / темже совершенна Того Бога  
и совершенна человека / воистину  
проповедающе, исповедуем Христа Бога нашего,  
/ Егоже моли, Мати безневестная, /  
помиловатися душам нашим.

Вход. Прокимен дне. Чтения три  
преподобническая.

Премудрости Соломоновы чтение. (Глава 3)  
Праведных души в руке Божией / и не  
прикоснется их мука. / Непщевани быша во  
очесех безумных умрети, / и вменися озлобление

исход их. И еже от нас шествие сокрушение, /  
они же суть в мире. / Ибо пред лицом  
человеческим аще и муку примут, / упование  
их бессмертия исполнено. / И в мале наказани  
бывше, / великими благодетельствовани будут, /  
яко Бог искуси я, / и обрете их достойны Себе: /  
яко злато в горниле искуси их, / и яко всеплодие  
жертвенно прият я. / И во время посещения их  
возсияют и яко искры по стеблию потекут. /  
Судят языком, и обладают людьми, / и  
воцарится Господь в них во веки. Надеющиеся  
Нань разумеют истину, / и вернии в любви  
пребудут Ему. / Яко благодать и милость в  
преподобных Его, / и посещение во избранных  
Его.

Премудрости Соломоновы чтение. (Главы 5 и 6)  
Праведницы во веки живут, / и в Господе мзда  
их, и попечение их у Вышняго. / Сего ради  
примут царствие благолепия, / и венец  
доброты от руки Господни, / зане десницею  
покроет я, и мышцею защитит их. / Приемет  
всеоружие рвение Свое, / и вооружит тварь в  
мечь врагом. / Облечется в броня правды, и  
возложит шлем, суд нелицемерен. / Приемет  
щит непобедимый преподобие, / поострит же  
напрасный гнев во оружие, / споборет же с ним  
мир на безумныя. / Пойдут праволучныя стрелы

молниины, / и яко от благокругла лука облаков,  
на намерения полетят. / И от каменометныя  
ярости исполнь падут грады, / вознегодует на  
них вода морская, / реки же потопят я нагло. /  
Сопротив станет им дух силы / и яко вихор  
развеет их, / и опустошит всю землю  
беззаконие, / и злодейство превратит престолы  
сильных. / Слышите убо, царие, и разумеите, /  
навыкните, судии концев земли. / Внушите,  
держащая множества, / и гордящиеся о  
народех языков, / яко дана есть от Господа  
держава вам / и сила от Вышняго.

Премудрости Соломоновы чтение. (Глава 4)  
Праведник аще постигнет скончатися, в покои  
будет. / Старость бо честна не многолетна, /  
ниже в числе лет исчитается. / Седина же есть  
мудрость человеком, / и возраст старости,  
житие нескверное. / Благоугоден Богови быв,  
возлюблен бысть, / и живой посреде грешник,  
преставлен бысть. / Восхищен бысть, да не  
злоба изменит разума его, / или лесьть прельстит  
душу его. / Рачение бо злобы помрачает добрая,  
/ и парение похоти пременяет ум незлобив. /  
Скончався в мале, исполни лета долга: / угодна  
бо бе Господеви душа его; / сего ради потщася  
от среды лукавствия. / Людие же видевшие, и не  
разумевше, / ниже положше в помышлении

такое: / яко благодать и милость в  
преподобных Его, / и посещение во избранных  
Его.

На литии стихиры, глас 1:

Радуйся, Ичалковския земли украшение,  
преподобне отче наш Филарете, / ты бо в малей  
своей пустыньке пятьдесят и шесть лет Господа  
ради своего терпеливно подвизался еси / и  
плотския страсти воздержанием своим чудным  
умертвил еси, / поживе тамо Христови  
благочестно, / Емуже ныне предстояй во славе  
невечерней, / моли спастися душам нашим.  
Радуйся, Ичалковская похвало, преподобне отче  
наш Филарете, / ты, на земли аки безплотен  
пожив, / постом и молитвою Бога себе  
милостива сотвори, / и дар прозрения и  
благоуветливости к людям обильно приял еси, /  
и по преставлении твоём чудеса тобою  
содеваются / всем с верою притекающим к ти,  
различными своими недуги одержимем. И ныне,  
отче наш блаженнейший, / моли о нас Спаса  
Христа, во еже спастися душам нашим.  
Радуйся, отче наш богомудрейший, / ты, на  
приалатырскую гору возшел еси, радуясь, / и на  
ней молитвою и трудом и в глубоцем своем  
смиреномудрии пожил еси / в сей временней  
своей жизни, / и тако совершая заповеди

Божии / и устрояя себе на небесех палаты  
нерукотворены, / иже уготова Бог любящим Его,  
/ аможе и преселился еси / к вечным сим  
обителем, и прият тя Господь с праведными, /  
их же житию и поревновал еси. / Рака же и  
святыя мощи твоя всем с верою притекающим к  
ти предлежат ныне во утешение / в разных  
скорбех и болезнях, милостивый наш  
уврачевателю. И ныне, преподобне отче наш, /  
не престай молити о нас прославляющих святую  
память твою / во еже спастися душам нашим.

Слава, глас 2:

Днесь наста светлая память преподобнаго отца  
нашего Филарета, / и вси собравшиися zde во  
множестве своем боголюбивии людие, /  
приидите, достойно ублажим дивнаго  
подвижника Ичалковския земли, / и предстояще  
ныне раце мощей его, прославим прославльшаго  
его Господа, / Иже труды и подвиги блаженнаго  
венча благодатию, / ибо святыя мощи  
преподобнаго чистоты жилище нам показашася,  
/ и, посещением Духа Святаго озарившиися, / в  
наше благословение семо ныне предложишася. /  
И вси чтущия сии святыя мощи / лобызати их  
подвизаются, чающе получитьи его молитв и  
благословения и веры своя утверждение и  
жития своего благонравное исправление.

И ныне, глас 8:

Радуйся, вселенная похвало, / Радуйся, Храме  
Господень, Радуйся, горо приосененная,  
/ Радуйся, всех прибежище, Радуйся, свещнице  
златый, Радуйся, славо православных честная,  
/ Радуйся, Марие, Мати Христова, / Радуйся,  
раю, Радуйся, Божественная трапезо, / Радуйся,  
сене, / Радуйся, ручко всезлатая, /  
Радуйся, всех упование.

На стиховне стихирь, глас 6:

Отче наш блаженне Филарете, / ты от юности  
своея Господа возлюбил еси, и Его легкое иго на  
ся восприем, / безвозвратно последовал Его  
путем, / и приял еси от Владыки Христа по  
делом своим должное воздаяние, / и со всеми  
благоугодившими Ему вечное сопребывание, и  
вечное с ними радование. / Того убо моли, отче  
наш святыи, / со святыми сими, / грехов  
оставление нам даровати / и душам нашим  
<испроси> велию милость.

Стих: Честна пред Господем / смерть  
преподобных Его.

Преподобне отче наш Филарете, / Ичалковския  
земли велие украшение, / тую бо зриши в  
православной вере утверждаему, / яко звезда  
светлая от Востока пришедшая / и люди  
мордовския, во мраце маловерия своего

сидящая, просвещающая и наставляющая в законе Господни, / и к небесному царствию всех призывающая. / Таже и нас, zde ныне сущих, не забуди, отче наш благий, своим предстательством и заступничеством / и душам нашим <испроси> велию милость.

Стих: Блажен муж, бояйся Господа, / в заповедех Его восхощет зело.

Богомудре авво наш Филарете, / священная главо, Господом вознесенная на Ичалковстей земли / и Имже прославленная горе на небеси. / И ныне, мы, родичи твои, отче наш милостивый и кроткий, / сердцем сокрушенным к тебе припадающе, просим, / молися, преподобне, Христу Богу, / православную нашу веру утвердити / и душам нашим <испроси> велию милость.

Слава, глас тойже:

Преподобне отче, во всю землю изыде вещание исправлений твоих, / темже на небесех обрел еси мзду трудов твоих, / демонския погубил еси полки, и ангельския достигл еси чины, / ихже житию без порока поревновал еси, / дерзновение имея ко Христу Богу, / мир испроси душам нашим.

И ныне, Богородичен, глас 8:

Безвестная Дево, яже Бога неизреченно зачещи плотию, Мати Бога Вышняго, / Твоих

рабов мольбы приими, Всенепорочная, / всем подаючи очищение прегрешений, / ныне наша моления приемлющи, / моли спастися всем нам.

Тропарь преподобнаго, глас 4:

От юности своя духовныя очи ко Господу устремив, / и Тому Единому служити искренне восхотев, / и любви Его ради любовь плотскую, дом отчий и вся блага его презрев, / в приалатырскую гору преселился еси, / и тамо благочестно в чине ангельстем пожил еси. / Сего ради вопием ти, блаженне отче наш Филарете, / молися за ны ко Спасу Христу Богу, / во еже спастися душам нашим.

Слава, и ныне, праздника, глас 7:

Преобразился еси на горе, Христе Боже, / показавый учеником Твоим славу Твою, / якоже можаху, / да возсияет и нам, грешным, / свет Твой присносущный, / молитвами Богородицы, / Светодавче, слава Тебе.

## НА УТРЕНИ

На Бог Господь: тропарь праздника дважды.  
Слава, преподобнаго, и ныне, праздника.

По первом стихословии седален, глас 8:  
Украшив душу твою добродетельми, / и  
временнаго жития поприще в страхе Божии  
прошед, / обрел еси благодать пред Богом; /  
Емуже с лики ангел предстоя, / моли, святе  
Филарете, даровати нам живот вечный и велию  
милость.

Слава, и ныне, Богородичен, глас тойже:  
Владычице, приими молитву раб Твоих, и  
избави нас от всякия нужды и печали.

По 2-м стихословии седален, глас 5:  
Постника Господня почтим, яко умертвившаго  
вся прилоги страстей / воздержанием и  
твердым терпением воистину, и посрамившаго  
зело противоборца врага / и всю сего гордыню,  
и ныне молящегося Господеви, / помиловатися  
душам нашим.

Слава, и ныне, Богородичен, глас 2:  
Ужасно чудо зачатия, и несказанен образ  
рождества в Тебе познася, Приснодево Чистая, /  
ужасает мой ум и удивляет помышление, / слава  
Твоя, Богородице, во всех прострися, ко  
спасению душ наших.

По Хвалите Имя Господне: припев:  
Ублажаем тя, преподобне отче наш Филарете, и  
чем святую память твою, наставниче монахов  
и собеседниче ангелов.

Псалом избранный: Терпя потерпех Господа:

По полиелеи седален, глас 1.

Подобен: Гроб Твой, Спасе:

Погребл еси страстей все востание  
умерщвлением плоти, священный отче, / жизнь  
безконечную по смерти приял еси, / темже  
днесь Христова Церковь празднует твою  
досточудную память, / преподобных украшение.

Слава, и ныне, Богородичен, глас 3:

Настави ны на путь покаяния, уклоняющихся  
присно к злым безпутием, / и преблагаго  
прогневающия Господа, Неискусобрачная  
Благословенная Марие, / Прибежище отчаянных  
человеков, Божие обиталище.

Таже степенна, 1-й антифон 4-го гласа.

Прокимен, глас 4:

Честна пред Господем / смерть преподобных  
Его.

Стих: Что воздам Господеви о всех, яже воздаде  
ми.

Всякое дыхание: Евангелие от Матфея, зачало  
43.

По 50-м псалме стихира, глас 6:

Преподобне отче, егда от дому изшел еси, / ни  
на град озрелся еси, / ни другое соединение, ни  
супружницы любви помышляя: / но купно вся  
земная возненавидев, / на небесная взирая, и к  
сим разум твой возвышая, / и якоже обещался  
еси, / тако благочестно совершил еси, тем  
память твою почитаем, досточудне.

Канон праздника, и преподобнаго, глас 4.

Песнь 1

Ирмос: Отверзу уста моя, / и наполнятся духа, /  
и слово отрыгну Царице Матери, / и явлюся  
светло торжествуя, / и воспою радуясь Тоя  
чудеса.

Припев: Господи Иисусе Христе, Сыне Божий,  
помилуй нас.

Господи, мой Господи, отверзи ми недостойному  
устне мои / во еже воспети и восхвалити по  
достоянию в песнях духовных святую память  
блаженнаго старца, / иже во святых отца  
нашего преподобнаго Филарета Ичалковскаго, /  
иже от юности своя Тя единого возлюби и Тебе  
Единому до конца жития своего верно послужил:  
Егоже молитвами, Господи Иисусе Христе, Сыне

Божий помилуй нас.

Припев: Преподобне отче наш Филарете, моли Бога о нас.

В дому родителей твоих первее познал еси Господа, преподобне отче наш Филарете, / идеже в дни отрочества своего послушая в сладость глас словес боголюбивыя родительницы своя / и тако семена ранее посеянная в сердце твоём духовных познаний возрастишася и даша многий и благий плод свой. / И ныне, отче наш боголюбивый, дерзновение имея ко Спасу Христу и по сродному к нам твоему благоволению, / помози нам ныне и присно / слышати слово Божие во умилении и в свое вечное спасение.

Свещник Ичалковский веси был еси светел, блаженне отче наш Филарете, / и всем приходящим к ти с верою путь спасения указуя, / темже молим тя ныне, молитвенниче наш неусыпный, / просветити души наша светом благочестия своего.

Горел еси желанием последовати стопам братии своя, блаженне отче наш Филарете, / родителие же твои препяша ти сотворити волю свою, / ты же смирил еси себе Христа ради, / исполнив заповедь Божию о послушании, и тако похваляюще твое о Господе святое смиренномудрие, / молим тя, отче наш

благосердый, / молися дати и нам сей святыи дар благорассудительности.

Богородичен: Молитву нашу приими, Пречистая, и молитвою Твоею всемошною избавитися нам от враг видимых и невидимых, от грехов же и всякия муки, моли, Егоже родила еси Человеколюбца Бога.

Катавасия праздника.

### Песнь 3

Ирмос: Твоя песнословцы, Богородице, / живый и независтный источниче, / лик себе совокупльшия / духовно утверди в Божественней Твоей славе, / венцев славы сподоби.

Христовой любовью уязвися сердце твое, преподобне отче наш Филарете, / и, пронзаем желанием чистоты и святости, предпочел еси уединитися, / и тако предуготовляя душу своєю супружницы добрыми словесы и поученьми, / с миром изыде на место своих подвигов, идеже указано ти бысть свыше. / И ныне молим тя, блаженне отче наш, / помолися за ны ко Господу, / во еже и нам направити стопы наша по словеси Божию.

Услаждая душу своєю речением Господа, / Иже глаголет, / яко всяк, иже оставит дом, жену и чад своих Мене ради и Евангелия, сторицею

восприимет мзду свою во Царствии Небеснем, /  
и тако внемя гласу Божию, отче преподобне, /  
взем крест на рамена своя, / оставив мир и вся  
яже в мире, устремил еси свой взор ко Спасу  
Христу, / и ныне предстоя пред Господем, /  
помяни и нас, отче наш святой, / чествующих  
святую память твою.

Христовым рачением возжигаем, отче наш  
богомудрый, / преложил еси вся тленная на  
нетленная, / претерпевая вся тяготы и лишения  
во еже положить начало, како благоудити  
Господеви, сего ради жизнь вечную на небесех  
наследовал еси, / моли спастися от бед и зол  
всем воспевающим святую память твою.

Богородичен: Вся ангелов воинства, Предтече  
Господень, / апостолов двенадесятице, святии  
вси с Богородицею, / сотворите молитву, во еже  
спастися нам.

Седален, глас 2:

Днесь исполняется радости Ичалковская земля,  
твое боголюбивое житие прославляючи. / Днесь  
христоименитии людие ревностию  
просвещаются, / зряще прославленные мощи  
твоя, преподобне, / днесь греховныя отгоняются  
страсти, и помыслы покаяния души объемлют, /  
имиже утверди всех, преславне, / верно  
почитающих святую память твою.

Слава, и ныне, Богородичен:

Стена непобедимая нам христианом еси,  
Богородице Дево, / к Тебе бо прибегающе,  
невредими пребываем; / и паки согрешающе,  
имамы Тя молитвенницу, / тем благодаряще  
вопием Ти: радуйся, Благодатная, Господь с  
Тобою.

Песнь 4

Ирмос: Седяй в славе на престоле Божества, /  
во облаце легце, / прииде Иисус  
пребожественный, / нетленною дланию, / и  
спасе зовущия: / слава, Христе, силе Твоей.  
По глаголу псалмопевца, не дая сна очима  
своима и веждома дремания, отче наш  
преблагий, / изливал еси молитвы своя ко  
Господу Сил, / и Тому Единому возвещая печали  
своя, / да дух крепости и разума восприимеши.  
/ Сего ради молим тя, преподобне отче, яко  
всякия добродетели образу навыкша, / помози и  
нам стяжати сия: да дух крепости и разума  
восприимем.

Тяготея обрести желаний край и утвердити  
сердце свое в любви ко Господу, преблаженне  
отче наш Филарете, / сего ради устремил еси  
стопы своя во обитель Саровскую, во еже  
облещися в ризы смирения и чистоты и  
подвизатися Господа ради в чине ангельством, /

и тако во вся дни живота своего последуя Ему Единому, якоже и обещаюся. / Помолися за ны грешныя, отче преподобне, во еже и нам обрести свой путь ко спасению.

Положил еси начало своему тихому и безмятежному житию, / и восхоте следовати им безвозвратно, / <темже> Господь умудри ты на сем пути и дарова ти дары Своя духовныя, / имиже и укрепляше ты, блаженне отче наш, / и ныне, предстоя Престолу Божию, не забуди и нас, ты воспевающих.

Богородичен: Покров и заступление и прибежище буди нам, Дево, рабом Твоим, изми ны от безмерных зол, / да воспоем Ти, Пречистая: слава Рождеству Твоему.

## Песнь 5

Ирмос: Ужасошася всяческая о Божественней славе Твоей: / Ты бо Неискусобрачная Дево, / имела еси во утробе над всеми Бога, / и родила еси Безлетнаго Сына, / всем воспевающим Тя мир подавающая.

Житие твое на земли, отче наш Филарете, чудно бысть, / и яко финикс на земли Ичалковстей процвел еси / словесы благоплодными и добронравным житием своим, / многия люди наставляя на путь истины и приводя их ко спасению. / Сего ради молим тя, молися за ны

ко Господу.

Святым Духом всяка душа живится и чистотою  
возвышается, / тако просветися и житие твое,  
блаженне отче наш Филарете, пред человеки, / и  
людие видеша дела твоя и прославиша Дивнаго  
во святых Своих Отца нашего Небеснаго.

Некогда приидоша к тебе, блаженне отче,  
разбойницы, и хотяше нечто похитити у тебе, /  
нанесоша ти многия раны и оскорбления, / ты  
же, вся кротко претерпев, / с миром отпустил  
еси их. / Темже убо помолися за ны, отче наш  
милостивый и кроткий, / дабы и нам стяжати  
такое незлобие и всепрощение.

Богородичен: Не престай молящи Егоже родила  
еси, Богоневесто, яко Сына и Владыку, /  
разрешение нам подати скорбей, и болезней  
облегчение, / яко да примем прощение, /  
песнословя Тя во веки.

## Песнь 6

Ирмос: Божественное сие и всечестное /  
совершающе празднество, / богомудрии,  
Богоматере, / приидите, руками восплецим, /  
от Нея рождшагося Бога славим.

Питая велию любовь ко храму Божию и велие о  
оном попечение / и всяко имея тщание быти  
тамо на молитве, отче наш блаженнейший, /  
идеже возносил еси молитвы своя ко Господу от

всеза души и всего помышления: / помози и нам, преподобне, / обрести таковыя доброделания: любовь ко храму Божию и усердие в молитве. Недугующу ти телом, но не душею, блаженне отче Филарете, / друзи твоя приснии, единожды хотяше преподати ти от сыновней любви своея врачевство свое земное, / ты же, отче наш благий, отверг еси то, глаголя: / "Господь взрасти ми сад и мне ли его попрасти", / и тако вдав себе в волю Божию и ею всяко руководим быв, / помози и нам, отче блаженне, согрети нашу веру и любовь яже к Богу, / да закону Его усердно последуем.

Днесь наставшая священная память твоя, блаженне отче наш Филарете, веселит и радует нас ичалковцев, воспевающих в песнях духовных подвиги и труды твоя и честное твое преставление славящих: / таже, во умилении глубоцем вопием ти, отче наш святе, / молитвами твоими всех нас покрый от всякаго зла и защиты.

Богородичен: Твою помощь даждь нам, и избави нас от бед и скорбей, и прегрешений наших, / Иже всех рождши Избавление.

Кондак, глас 4:

Украшившись добродетельным своим житием, / в мире живя премирно, преподобне отче

Филарете, был еси для многих советник благий / и немощствующим врач; и ныне ичалковцем ты еси похвало и радование.

### Икос

Возлюбив, преподобне, божественные Христовы заповеди и возненавидев мира сего наслаждения, / и тако, умно в себе рассуждая, / притекл еси к Тому, и был еси светильник светел, / просвещая ичалковстии концы блистанием своего духа. / Тем припадая, молим тя, отче Филарете: / просвети очи наши душевныя, еже воспети твоя подвиги, / пощение, бдение, слезы, болезни и всякое изнурение тела, блаженныя ради будущия жизни, / еяже ныне наслаждаешься, и сие убо мы ясно зрим, темже и вопием ти во умилении сердечнем: / ты еси ичалковцам ныне похвало и радование.

### Песнь 7

Ирмос: Не послужиша твари богомудрии паче Создавшаго; / но огненное прещение мужески поправше, / радовахуся поюще: / препетый отцев Господь и Бог, благословен еси.

Яко возненавидел еси вся скоропреходящая в мире сем и возлюбил еси нищету Христову, отче наш Филарете, / яко просил сия, тако по

достоинству прияти и сподобился еси / по  
неложному гласу Владыки Христа: просите и  
приимете, / вопия: Боже, благословен еси.  
Архангельский храм наш, о немже некогда сам,  
отче наш блаженнейший, печашеся, / в немже и  
молитвы своя, воздея руце свои, возношаше, /  
ныне прославися, и место, идеже положишася  
честныя мощи твоя, духовно освятися, / и по  
мнозем концем земли, дом наш — дом молитвы  
прославляется, / яко в себе мощи твоя честныя  
имущи. Сего ради и мы вопием: Боже,  
благословен еси.

Нас ичалковцев духовно хотя обновити и  
благопоспешити делу спасения душ наших, /  
Господь Человеколюбец, не хотяй смерти  
грешника, воздвигл еси нам / в пределах  
Ичалковския веси угодника Своего, святого  
блаженнаго старца монаха Филарета, / егоже  
мы ныне любезно именуем и молитвенно к нему  
взываем: / преподобне отче наш Филарете, /  
услыши глас молений наших и вкупе с тобою  
немолчно вопием: / Боже, благословен еси во  
веки.

Богородичен: Ново Отроча рождши,  
Пребезначальное Слово, обветшавшия ны  
грехомновила еси Дево, и пети укрепила еси:  
отец наших Боже, благословен еси.

## Песнь 8

Ирмос: Отроки благочестивыя в пещи, /  
рождество Богородично спасло есть: / тогда убо  
образуемое, ныне же действуемое, / вселенную  
всю воздвизает пети Тебе: / Господа пойте дела,  
и превозносите Его во вся веки.

К честным мощем твоим яко к неборимому  
покрову прибегающе, немолчнаго твоего  
ходатайства, блаженне отче Филарете, просим: /  
ты же не презри нас, иже от тебе требующих  
помощи, / но услыши и заступи всех нас, /  
превозносящих Владыку Христа во веки.

Всем притекающим к тебе, блаженне отче наш,  
ты слезы отираеши, испрашивающим твоего  
благаго совета — ты советодатель есть, / всем  
бедствующим в житии своем руку помощи  
простираеши, / темже помяни и всех нас,  
блаженне, верою поющих твою святую память /  
и превозносящих Господа во веки.

Ныне приалатырская твоя пустынька с  
прославлением честных мощей твоих светло  
красуется и прославляется, / людие же  
ичалковстии, житию твоему ревнующе / и о  
твоей памяти духовно радуящися, / Господа  
славословят и превозносят Его во вся веки.

Богородичен: Ты еси верным похвало,  
Безневестная, Ты заступление и священное  
прибежище христианом, / к Сыну бо Твоему и

Богу мольбы носиши, Всенепорочная, / и от бед спасаючи, верою и любовьию Богородицу чистую Тя воспевающих и величающих.

## Песнь 9

Ирмос: Всяк земнородный да възиграется, духом просвещаем, / да торжествует же бесплотных умов естество, / почитающее священное торжество Богоматере, / и да вопиет: / радуйся, Всеблаженная Богородице, чистая Приснодево. Невозвратно шествовав вѣдущими к небеси Божественными стезями, досточудне отче наш Филарете, / ко греху же вѣдущих до конца уклонился еси, / помози и нам, верою тя блажащим, ходити безпорочно и свято в законе Господни.

От всякаго пути лукава възбраних ногама моима, / яко да сохраню словеса Твоя, и паки: чаях, спасения Твоего, Господи, / яко заповеди Твоя возлюбих; / и ныне предстояще пред рацей мощей твоих, преподобне отче наш Филарете, / мы имама веру несумненну и утверждение, яко идеже Аз есмь, тамо и слуга Мой будет — сей глагол Божий уверяет нас, / яко ныне ты со ангелы и святыми водворяешься и славословиши Творца Всяческих.

Твой есмь аз, спаси мя, яко оправданий Твоих възисках, — / тако в молитвах своих ко Господу

взывал еси, преподобне отче наш, / и паки:  
жива будет душа моя и восхвалит Тя; / и ныне  
мы предзрим на престоле висоце Господа славы,  
/ вещающа угоднику Своему: вниди в радость  
Господа своего.

Радуйся, и мы тебе вопием, отче наш  
блаженнейший, / небесный наш небожителю, /  
и нас на земли почитающих святую память  
твою, / молитвами твоими сподоби о Дусе Святе  
радоваться.

Богородичен: Упование и радости наша, Марие  
Богоневестная, / покрый нас честным Твоим  
омофором, / да хвалим непрестанно имя Твое, /  
и поем с бесплотными лики, Тя величающе.

### Светилен

Процвел еси яко финикс давидски, отче, / и  
обитель явился еси Духа Пресвятаго, / и <Той>  
славна тя Ичалковстей земли показа. / О нас  
непрестанно моли, / почитающих верою  
пречестную память твою, преподобне Филарете.

### Богородичен:

Тя песньми немолчными ублажаем, Дево, яко от  
Троицы Единого родила еси, Богородице, / и  
носиши на Божественную руку Пребогатое  
Слово, непременно и неизменно.

На хвалитех стихиры, глас 8:

Приидите, христоименитии ичалковстии людие,  
/ приидите, Православных множества, /  
песнями почтим преподобнаго отца нашего  
Филарета, / подвижника приалатырския крутыя  
горы, / иже все желание свое к Богу простер, /  
мирскую красоту яко непребывающую оставил  
еси / и Христу богомудро всецело себе возложил  
еси, / тесный путь в житии своем прешел еси, /  
подвигом добрым в горе той подвизаяся / и Богу  
всею душею работая, / и тако до конца жития  
своего земнаго / верно послужил еси Ему, / и  
яко победоносец прияв от Него венец  
неувядаемый.

Прииде пресветлый день праздника  
Ичалковския земли, / памяти преподобнаго отца  
нашего Филарета. / Имже просия, яко солнце,  
блистаючи / светлыми лучами добродетельных  
деяний блаженнаго, / и озаряючи боголюбивыя  
сердца, / темже и мы вси вкупе, / во оный день  
празднующе, / достойно тя, отче наш, вси  
ублажаем.

Молитвенник к Богу усерден быв, / чистоты  
рачитель, / целомудрия подражатель явился еси  
Алексию, человеку Божию, / и вся мимотекущая  
и прелестная ногама твоима попрах еси, / и  
дивными подвиги в пустыньке своей Царствие  
Небесное стяжал еси, / идеже и нас помяни,

блаженне отче наш, / почитающих святую  
память твою.

Отче Богомудре Филарете, / ты всяко на земли  
Христа возлюбил еси / и любви Его ради  
поревнуя братии своей, / монашеское житие  
измлада избрав, / и отсюда просияв  
добродетельным своим житием, / ныне на  
Небесех ликуеши со ангелы и со всеми святыми,  
/ темже поминай нас, блажащих тя на земли, /  
и святое твое преставление прославляющих.

Светлая и всепразднственная <показася> нам  
честная твоя память, преподобне отче наш  
Филарете. / Днесь Ичалковская страна духовно  
веселится и радуется, / прият тя, блаженне, яко  
единого от сродник своих земных, / ныне же  
суца ты во святых своих у Господа, Иже на  
небесех. / И мнози боголюбивии людие во  
множестве ныне zde собращася / в  
великолепный сей Дом Божий на молитву, /  
Господа прославляюще, дивного во святых  
Своих.

Преподобне отче наш Филарете, / сошедшеся  
любвию в память твою ко всечестной твоей  
раце, / светло торжествующе, во гласех  
песенных поюще, / и давидски глаголюще: /  
Блажен муж, бояйся Господа, непорочно бо в  
путех Господних ходил еси. / Темже с

преподобными ныне водворяяся, / Господеви  
молися, / помиловаться душам нашим.

Слава, глас 4:

Преподобне отче наш Филарете, / в монашестве  
пожил еси непорочно благоугодно Господеви, / и  
елико трудоположно начал еси, / изрядно и  
чудно скончал еси / и всесовершенно во страхе  
Божии, / воздержанием сияя, / кротостию  
взора, благоуветливостию к людям, / темже  
любовию ныне память твою, блаженне отче наш,  
ублажаем.

И ныне, глас 5:

Блажим Тя, Богородице Дево, / и славим тя  
вернии по долгу; / град непоколебимый, стену  
необоримую, твердую предстательницу, и  
прибежище душам нашим.

Славословие великое.

### **НА ЛИТУРГИИ**

Блаженны, праздника от канона песнь 3-я, на 4,  
и преподобнаго, песнь 6-я, на 6.

Тропарь праздника и преподобнаго.

Прокимен праздника и преподобнаго, глас 4:

Честна пред Господем / смерть преподобных  
Его.

Стих: Что воздам Господеви о всех, яже воздаде  
ми.

Апостол к галатом, зачало 213.

Алилуия, глас 6.

Стих: Блажен муж, боияся Господа, в заповедех  
Его восхощет зело.

Стих: Сильно на земли будет семя его.

Евангелие от Луки, зачало 24.

Причастен: В память вечную:

